

# 泉州崇福寺常覺法師塔碑銘

法師諱禪真，常覺其字也。族閩南晉江王氏，生而穎慧，天資俊秀，少有遠志，早懷出塵。年十七，辭親祝髮，師事泉州崇福寺元鎮上人，旋入廈門南普陀養正院修學。翌年，負笈杭州武林佛學院，親近會覺長老等名德。年二十，赴普陀山法雨寺，圓具足戒。一九四八年聞印順導師駐錫杭州西湖香山洞，乃往依止，從此親炙印公，學經受教，助轉法輪，為印公門下重器。一九四九年侍印公返廈門，就學大覺佛學社。未幾，烽火連天，隨印公避亂香江，先後挂鉢粉嶺、大埔、荃灣等處道場，雖生活艱苦，惟窮且益堅，自得法樂。先是一九五二年，印公於台灣新竹勒建福嚴精舍，師於一九五三年由港入台，佐助印公建道場、興文教、轉法輪，歷四十寒暑，克勤忍苦，勝行過人，同門交讚，緇素咸欽。師於文教，貢獻尤深，曾主編《海潮音》、《獅子吼》等月刊，規劃出版《正聞學社叢書》，揚佛慧業，導人正思。至於講學，則先後任教福嚴、太虛、香光、曉光、圓光、元亨等佛學院及玄奘大學、中國佛學研究院等院校。師深入經藏，博學廣覽，談吐風趣，說理清晰，深受學子愛戴，望重杏壇，聲蜚教界，門下桃李崢嶸，遍及海內外。大陸改革開放

後，師返故里，禮謁祖庭，見寺宇殘破，殿堂摧朽。薤落情深，法乳恩重，不忍坐視，乃肩負重建重任。惟工程資金浩大，而師平時既無集蓄，更無外緣，於是倡募海內外，奔波兩岸間，櫛風沐雨，辛勞至極。十載艱辛，厥功告成。於二〇〇二年冬，舉行重建落成，古刹重光，宗風再振。而師卸下重任，功成身退，隱遁西湖覺林精舍，讀經習禪，寧靜潛修。惟十年勞心勞力，身心疲憊，嬰胰腺之疾，乃於二〇〇四年返台，入慈濟醫院治療，康復後，於二〇〇五年底返泉州，豈料二〇〇六年三月十日，忽感不適，住院至十六日晨八時二十分，捨報示寂，上生兜率。師生於一九二八年（民國十七年）農曆八月初一日，世壽七十有九，戒臘五十九夏。師生性謙和，氣度儒雅，一生澹泊名聞，勁節高風，誠當代潛光實德之高僧也。謹述景行，用泐塔碑，並頌之以銘曰：

於鑠閩南	僧哲之鄉	法師應跡	誕降晉江	天資聰穎	氣度軒昂
識量高遠	心印舒光	依止名師	解行翼張	教理精徹	慧海汪洋
揚佛慧業	正法扶匡	作育後進	杏壇芬芳	中興崇福	祖印輝煌
法脈長流	重振寺綱	祖庭建塔	遺德彌彰	僧範永垂	法祚綿長

台北善導寺

謹撰